



Adresa: **Ul. Hamdije Čemerlića 39a**
71000 Sarajevo
<http://www.voda.ba>

tel. +387 33 726 444
fax. +387 33 726 423
e – mail: info@voda.ba

Broj: **UP-1/21-3 40-149-2/26**

Datum: **14.04.2026. godine**

«Agencija za vodno područje rijeke Save», Sarajevo po zahtjevu pravnog lica JP „Elektroprivreda BiH” d.d. Sarajevo TE Kakanj, a vezano za aktivnost privremenog i kontrolisanog direktnog ispuštanja tehnoloških otpadnih voda u rijeku Bosnu, na osnovu člana 132. i člana 133. Zakona o vodama («Službene novine Federacije BiH», broj 70/06) i člana 270. Zakona o upravnom postupku («Službene novine Federacije BiH», broj 2/98, 49/99, 61/22), donosi:

Nalog

1. U cilju saniranja kvara na postrojenju za tretman tehnoloških otpadnih voda na prelivnim kanalima u koagulatoru, koji se treba izvesti u periodu od 25 (dvadeset pet) dana od izdavanja ovog naloga, odobrava se JP „Elektroprivreda BiH” d.d. Sarajevo, Podružnica TE Kakanj, privremeno i kontrolirano ispuštanje tehnološke otpadne vode iz pogona za tretman otpadnih voda – TEHNO, uz slijedeće uslove:
 - Da se vrši monitoring kvaliteta i kvantiteta otpadnih voda prilikom ispuštanja tehnoloških otpadnih voda putem laboratorije ovlaštene od strane Federalnog ministarstva poljoprivrede, vodoprivrede i šumarstva. U toku ispuštanja tehnoloških otpadnih voda iz pogona za tretman otpadnih voda – TEHNO, vršiti redovna ispitivanja kvaliteta otpadnih voda, uzimanjem uzorka efluenta iz okna za monitoring u skladu sa Uredbom o uslovima ispuštanja otpadnih voda u okoliš i sisteme javne kanalizacije («Službene novine Federacije BiH», broj 26/20 i 96/20). Rezultate analiza dostaviti ovoj Agenciji.
 - Da se ispuštanje otpadnih voda vrši kontrolisano i na način da uticaj istih na kvalitet podzemnih i površinskih voda bude izražen u što je moguće manjoj mjeri.
 - Korisnik ovog vodnog naloga je u obavezi da imenuje odgovorno stručno lice sa osnovnim zadatkom kontinuiranog nadzora (praćenja i kontrole) nad provođenjem aktivnosti na povremenom ispuštanju otpadnih voda.
 - Da se izbjegavaju „udarna” ispuštanja kao i ispuštanja u malovodnom periodu.
 - Da se formira i vodi knjiga - dnevnik u kome će se registrovati vrijeme i količine ispuštene vode kao i opažanja i aktivnosti u postupku privremenog i kontrolisanog ispuštanja tehnološke otpadne vode iz pogona za tretman otpadnih voda – TEHNO.
 - U slučaju opažanja bilo kakvih promjena koje bi imale značajan uticaj na površinske i podzemne vode obustaviti privremeno ispuštanje tehnološke otpadne vode.
2. Na osnovu utvrđenog stepena zagađenja ispuštenih otpadnih voda izraženog preko broja EBS-a, (ispitivanje urađeno od strane ovlaštene laboratorije) u skladu sa Zakonom o vodama („Službene novine Federacije BiH”, broj 70/06) i Pravilnikom o načinu obračunavanja, postupku i rokovima za obračunavanje i plaćanje i kontrolu izmirivanja obaveza na osnovu opšte vodne naknade i posebnih vodnih naknada, Poglavlje IV („Službene novine Federacije BiH”, broj 92/07, 46/09, 79/11, 88/12 i 03/16), korisnik je obavezan za utvrđeni broj EBS-a prema rezultatima ispitivanja plaćati posebnu vodnu naknadu za zaštitu voda za ispuštene tehnološke otpadne vode iz pogona za tretman otpadnih voda – TEHNO, prema uslovima iz ovog naloga.
3. Ovaj vodni nalog se daje na određeni period od 25 (dvadeset pet) dana od izdavanja ovog naloga.
4. Ukoliko zbog navedenih aktivnosti dođe do promjene ili poremećaja kvaliteta podzemnih i površinskih voda, korisnik objekta obavezan je izvijestiti nadležne organe i izvršiti izvanredna postupanja po nalogu nadležnih organa, te o vlastitom trošku uzroke štete otkloniti, a nastale štete nadoknaditi.

Obrazloženje

Pravno lice, JP „Elektroprivreda BiH” d.d. Sarajevo, Podružnica TE „Kakanj”, zahtjevom broj: 02-42-3 -3360-1/2026 od 13.04.2026. godine se obratilo ovoj Agenciji za donošenje rješenja o vodnom nalogu za aktivnost privremenog i kontrolisanog ispuštanja tehnoloških otpadnih voda iz pogona za tretman otpadnih voda – TEHNO. Zahtjev je zaprimljen na protokolu Agencije 14.04.2026. godine.

Uz zahtjev je dostavljena slijedeća dokumentacija:

- Kopija uplatnice za upravnu taksu u iznosu od 60.00 KM,
- Informacija broj: 02-3 -5294-1/2026 od 10.04.2026. godine.

Dana 10.04.2026. godine, putem elektronske pošte dostavljena je informacija da se planira obustava rada koagulatora i direktno ispuštanje tehnoloških otpadnih voda u rijeku Bosnu u periodu od 13.04.2026. godine u trajanju od 25 dana. Uvid u navedenu informaciju je izvršen 13.04.2026. godine. Podnosiocu zahtjeva poslato je obavještenje da za privremeno i kontrolirano ispuštanje tehnološke otpadne vode treba pokrenuti aktivnosti koje se propisuju nalogom i da su obavezni obratiti se ovoj Agenciji zahtjevom za izdavanje naloga. Obzirom da je informacija o direktnom ispuštanju tehnoloških otpadnih voda nije dostavljena blagovremeno, podnosilac zahtjeva je putem e-maila upozoren da prilikom vanrednog ispuštanja otpadnih voda treba pokrenuti aktivnosti koje se propisuju nalogom kao i u ranijem slučaju (nalog broj: UP-1/21-3-40-527-2/24) i da se za ovakve aktivnosti treba obratiti minimalno 5 dana ranije od planiranog datuma izvršenja aktivnosti – u ovom slučaju direktnog ispuštanja.

U dostavljenom zahtjevu se navodi da je došlo do puknuća na cjevovodima koji služe za propiranje cjevovoda za evakuaciju materijala iz koagulatora te je potrebno izvršiti saniranje kvara na postrojenju za tretman tehnoloških otpadnih voda.

Da bi se izvršilo saniranje navedenog kvara, čija je funkcija prevođenje prečišćene otpadne vode u pumpnu stanicu PS-6 odakle se voda ispušta u rijeku Bosnu, neophodno je izvršiti obustavu, čišćenje i evakuaciju nataloženog mulja i šljake sa dna koagulatora.

U zahtjevu je navedeno da je planirana obustava rada koagulatora u ponedjeljak 13.04.2026. godine u 8:00 sati a planirani period pražnjenja, čišćenja koagulatora i saniranje kvara na prelivnim kanalima koagulatora je 20-25 dana.

Zbog navedenog neophodno je izvršiti kontrolisano ispuštanje tehnološke otpadne vode direktno u rijeku Bosnu, za vrijeme izvođenja radova saniranja navedenog kvara.

Za aktivnost ispuštanja tehnoloških otpadnih voda i oborinskih onečišćenih voda u recipijent rijeku Bosnu iz objekata i pogona za proizvodnju toplinske i električne energije u TE Kakanj, deponije šljake i pepela Turbići, izgrađenih u mjestu Čatići, općina Kakanj, investitoru JP Elektroprivreda d.d. Sarajevo Podružnica TE Kakanj je od strane ovog organa izdato rješenje o vodnoj dozvoli broj: UP-1/21-3-40-501-7/23 od 26.02.2024. godine, kojim su propisani uslovi pod kojim se, sa aspekta voda, mogu provoditi ove aktivnosti.

Na osnovu svega navedenog i zbog činjenice da su nastupile okolnosti koje onemogućavaju ispunjenje svih uslova propisanih navedenom vodnom dozvolom, radi usklađivanja postupanja u skladu sa novonastalim uvjetima, a u skladu sa članom 132. i članom 133. Zakona o vodama («Službene novine Federacije BiH», broj 70/06), u postupku rješavanja predmetnog zahtjeva, odlučeno je da se za namjeravanu aktivnost izda Nalog.


Obzirom da je zahtjev za izdavanje naloga zaprimljen na protokolu Agencije 14.04.2026. godine a aktivnost privremene obustave rada koagulatora, čišćenja i evakuacije nataloženog mulja i šljake sa dna koagulatora započeta je 13.04.2026. godine, ovim nalogom u periodu od 25 (dvadeset pet) dana od izdavanja ovog naloga, tačkama 1. do 4. dispozitiva Naloga, propisani su uvjeti u skladu sa članom 132. stav 1. i 2. Zakona o vodama, a u vezi sa članom 13. Uredbe o uslovima ispuštanja otpadnih voda u okoliš i sisteme javne kanalizacije, uslovima pri kojim neće se bitno degradirati kvalitet vode, promijeniti morfologija nizvodnog korita rijeke Bosne, te štetno uticati na akvatične i poluakvatične ekosisteme na nizvodnom toku rijeke Bosne.

Na osnovu predviđene aktivnosti i na osnovu članova 132. i 133. Zakona o vodama i člana 200. stav 1. Zakona o upravnom postupku, odlučeno je kao u dispozitivu Naloga.

Uputa o pravnom lijeku:

Protiv ovog rješenja može se izjaviti prigovor u roku od 7 dana od dana prijema Rješenja. Prigovor se podnosi neposredno pismeno Agenciji za vodno područje rijeke Save Sarajevo.

Obrađivač akta: Behija Ahmedić, dipl.inž.tehn.

Po ovlaštenju
Rukovodilac sektora za izdavanje vodnih akata

Nihad Pezo, dipl.inž.građ.

Dostaviti:

- ☉ JP Elektroprivreda BiH d.d. Sarajevo, Podružnica TE „Kakanj“, Kakanj
- FU za inspekcijske poslove, Vodna inspekcija Sarajevo,
- AVP Sava, ISV-vodna knjiga
- Org.jed. 50
- Org.jed. 40-arhiva
- Oglasna tabla AVP Sava Sarajevo